

671.4329
084
17

卷二十

傳六 方技

卷二十一

錄一 藝文上

卷二十二

錄二 藝文中

榮河縣志

趙書麟題



榮河縣志卷二

傳六

方技

趙興運邑諸生明天文壬遁之學順治初常語儕輩曰吾夜觀天象執法北流當有貴人潛出者時御史劉達按蒲州微行訪事適奏聞興運語不覺悚然急遣所隨吏邀之欲延入署興運不見而去以子廷棟貴贈明威將軍武昌衛守備

王洪基王顯庄人明季兵燹之後戶口寥落田畔混淆康熙四十四年洪基諳練九章逐段丈量彙集成帙名曰地冊某地若干

闊長某地若何方向有奇袤者必繪圖注記旋呈邑侯用印以示不易榮邑沿河一帶間有地冊原上俱不概見以故彼此相侵不均不平百數十年中因參差而鳴於官者何可勝數惟王顯一庄地雖屢經分合而挨次稽查毫釐不爽洪基之力也村人每傳誦弗置云

楊岐正通堪輿尤精岐黃術家不中貲而性喜施予遇病醫治祁寒暑雨弗避也貧家無力市藥輒代爲籌之沒後老幼送殯者幾空一村

崔登泰立心公平視侄猶子里有因端興訟者必排解之至帖然

乃止每舉孝友恭儉諸大端爲幼輩懇懇開導以故稍知自好者咸樂與居遊通岐黃術應答無虛日嘗曰余無餘貲濟人區區薄技何吝焉

王禪少負才名得讀書樂境因偃蹇文場經史而外兼精岐黃術每切一脉立一方靡不應手輒效里黨無力市藥者恒備丹丸散給之晚尤豪邁語言偶有缺失識者原焉

王恩奎字雲卿叙州公星生第三子也晚年精堪輿尤通岐黃術恒備藥材如法炮製凡鄉里患病診後照方付藥不取其值至今人皆德之

王佩璜字礪溪新安村人性孝友讀書多會悟父警齋有高識常告佩璜曰人生貴有濟於世徒博取一衿以爲鄉黨榮何裨於人佩璜由是專力於內難二經及張機王熙孫華原遺著數年學成造門請治者踵相接佩璜不論親疏遠近悉竭誠診視遇極貧而疾劇者雖嚴寒酷暑戴月冒霜徒步數十里旣無德色亦無倦容人以是推爲長者不濫交游惟與尋侍御鑾煒薛明經仕傅爲道義交待御嘗手書壁聯贈之曰妙機其微超心煉冶情性所至著手成春蓋紀實也

牛道隆字達臣清道光時人也少穎悟性樂施嘗解囊贍同學之

貧乏者入泮後潛心於醫精岐黃之術鄉里求診者絡繹不絕業醫五十餘年活人無算故其子星橋等俱以醫名

牛星橋字槎仙清廩生也性聰慧少時讀書過目不忘十七歲入庠父教以六經兼令習醫弱冠時即善治病潛修十餘年醫業甚精時稱爲壽世之能手云

牛惠善字可欲道隆之孫也其父星照命學醫二十七歲由省立醫學傳習所畢業旋充軍醫官雁北涿州之役士卒受傷甚多給養絕乏惠善乃罄所得薪餉維持救護兼爲醫治識者稱善張祥鶴字臯賓清乾隆時廩貢也少讀詩書晚通岐黃術濟世活

人不受謝儀鄉人有病即往診視不憚煩勞年七十九而卒

薛益科字好謙庄頭村人性沉毅通岐黃術尤善跌打損傷門凡一切轉筋續筋移骨接骨各症無不應手奏效平日車馬盈門甚有不遠數百里而來者

王俊川字雨三大榮庄人習岐黃術通內外兩科惟針灸一門特長生平不嗜錢嘗語人曰救人一命勝造七級浮屠故以病好是卜不求謝儀村人贈以妙術通神四字

潘清和王正村人也幼賈於陝多贏晚習扁鵲術其針灸神妙往往能一針起死回生人稱爲潘神仙年逾古稀而卒老幼送殯

者幾空一村

孫永成字美軒寺后村人精岐黃術對於人畜等症無不手到病除因此踵門求診者絡繹於道至今鄉鄰猶頌弗置云壽八十五歲

聶登雲上王信村人種瓜得善術每年收穫高人數倍以致發家壽七十八歲

武殿明程樊村人也習岐黃術凡瘡癰毒蛇瘋狗所嚙禁之最捷其法對於患症招之使來用口作咒咒畢麾之使去必無旋踵頗有應驗迄病愈以財物來謝不受不來無憾

周篤慶少負才名經史而外兼精岐黃術每切一脉立一方靡不應手輒效人呼爲神仙里黨無力市藥者恒備丹丸散給之合村匾其門曰仰切高山

周一清字玉山清生員素精岐黃術切脉立方並不抄錄成方然人飲其藥輒獲效數年沉疴應手而愈門前謝匾甚夥享年八十有奇

王作命字誥臣號異人世居新安村高祖仲謀公曾祖警齋公祖潘瑛公俱以精通岐黃蜚譽當時先生幼年天姿岐嶷歷境崎嶇始習商旋棄商就讀發憤勵學入邑庠補增生秉性恬澹專

心於醫識解過人讀書得間博極羣書類皆能得其要領而生
平精力所寄多在張仲景傷寒一門以故臨症製方輒中肯竅
善醫之名鵲噪一時由是河內外數百里耳其名求診者踵相
接設藥坊於光華鎮躬親炮製力排賈僞而光華鎮之名竟借
人以傳前任縣長郭張二公造門延診因病施治無不應手霍
愈郭公手撰屏聯讚美有加張公贈謝匾額題曰醫名三晉即
此可想見其醫道之高矣

成大緯字子經精岐黃術輕財重義診病無分畛域故秦豫兩省
人與之贈匾者不少

柴喜祥城關人也性聰穎多技能好發明各種機器當二十年前窮鄉僻壤未有紡線機喜祥從理想上造出一種紡線機雖不大適用而構造頗有可觀

周敬答廩貢生少負才名晚年尤精岐黃遇病醫治不受贖儀人皆稱善

王炳鉞字子威號鳳陽晚年自號柏峯老人幼性豪爽能文補諸生後應鄉試十四次被荐者九備中者四雖名困圍場而有識者常比之劉蕡下第云晚以醫自隱不求名利而遠方邀請診治者踵趾相接殆所謂愈隱愈顯者歟

潘四任張家庄人也精拳術有少林風範清咸豐元年臨晉丁庄村巨富范姓被刼失銀數千騾馬七匹賊盜數十人明火刼殺聲勢甚大四任單騎直搗賊穴擒盜首及銀兩馬匹一併送縣不言謝貲而去其豪俠類如此

柴德琳馮村人生性靈敏善書尤精繪畫縣屬寺廟壁間所繪人物多出其手中坑東村關帝廟有繪許昌驗馬一事精神活潑見者均稱贊不已近年各村凡有柴姓繪者雖牆壁破壞猶思保存

邵子英坑西村人性誠實精繪畫尤長於山水縣屬求繪者踵門

不絕雖屬工筆價值頗昂當時人嘖嘖稱譽柴畫人物邵畫山水

孫振芳周王村人性忠厚善畫畫虎尤佳解縣關帝廟午門前所繪之虎實出其手姿勢兇猛色相如生人咸稱贊名振一時

傅守德字叙九號次山楊林庄人精醫術曾充陸軍軍醫官現年老家居鄰村來請雖嚴寒炎暑必往又好善事恒備丹丸散給於人不索其值著有保赤登壽集一書行世

王壯猷字麗閣倉里村人幼遵父訓習岐黃術精研內經而外並參各種醫書察其異同久之盡得其妙決定去取每製一方雖

非新意而斟酌增減並非食古不化者可比

李瑞蘭字香畹倉里村人清生員醫理精詳民國十年充本縣中醫改進研究會會長遇病悉心考察必得其原無論貧富求醫者概無難色鄉人嘖嘖稱善

李東平清鄉飲耆賓也善陰陽及奇門易數能知未來事其子邑庠生定國運庠生友芝均能承世業名噪一時

武本莊武林棠二人係堂兄弟均精岐黃術遇病輒醫不計謝貲多寡故其聲望頗隆

王拯元山西省立第二中學校學生也善運動民國八年開華北

第七次運動會拯元赴會賽跑競走列爲第一計得獎狀並金色獎章銀盾各一實足炫耀一時云

李傳璧字植卿傳盪字子金皆臺香先生之子也先生晚年脾胃虛弱偶感風寒遂病下痢或在太陽或在陽明或在少陽或在三陰經延醫療治稍不得病反變本加厲二人因念程子有爲人子者不可不知醫之言乃棄儒習醫勤求古訓博覽羣書於臨證診脈處方之法無不研究精當每遇先生不豫時親爲診視竟然藥到病除有時他人請診往往藥不終服病即立已蓋二人因療親疾幾經歷練而術始得至此三折肱之工也然二

人之心自視嘗若不足不肯公然應世及不得已而投以唾餘無不效若桴鼓誠深洞悉夫傷寒溫病之源固非世之以口給禦人者所可比也

范達武字定卿醫士也始以其父善醫牛馬遂繼其業焉公爲人和藹凡就醫或延請醫病者至公必餉以飯家人亦無難色及公病篤呻吟床第有鄉人某携牛一頭就醫聞公病不能步履謁公懇示一方公聞之嘆曰貧家購一牛亦大不易焉可冒昧念其遠來矚家人舁至門首視其牛旋令家人執筆口授以方鄉人持之歸村人聞之無不贊頌公之體貼人情無微不至也